

## **Wrkapm ep a Pol nira eng Timoti Yangkipm a la ela ep**

Timoti pa kil melnum a ukipma Krais pa weten. Kil melnum a anong wail Listra, a anong kanokg Kalesia. Man akilen pa a tu Suta a yan akilen pa a tu Krik. Pol kil akawi Timoti pa ekg atn akwap angkli yangkipm a Maur Wailen. (Ri Kwap 16:1-3). Atom kil elng Timoti pa rpma anong wail Epesus pa ikgalen tu wrong kin a kipman mapming a ukipma Sisas pa. Atom kil nira wrkapm ep kil ukwantel kai, lanakel la, kil mpa ikglen tu wrong kin kipman a ukipma pa riworwor, eng ake mpa tu tiur lok ipma a tu a uk Sisas ti kai paipm pa. Nikgwalpm a tu melnum pa wa rka manet lala, kweikwei wrongkwail a itna kanokg ti ake wor wrisen. Kolpa atom melnum la kil a uwi Maur Wor a rpma wor yongkyong pa, kil mpa ngklon ike okipma tiur, a ake mpa kil uwi kin pa iye.

Wa kwei ur wail a Pol la katnukg ela wrkapm kil pa, kil la ya wa kapor kilko alein ngkat nang a Maur Wailen, a wa la kwap kolai mpa tu mapming wrong kin a kipman a ukipma Sisas mpa ik pa. Wa kil la tu mpa ngkit melnum kolai kolai a la ikglen kwap wris wris a tu ak pa.

Yangkipm aimprek pa Pol la Timoti mpa plan nikgwalpm wor kolen la kil melnum akwapel a Sisas Krais, wa kil lanakel ya a kil mpa ikglen a

lok tu pa kolai kolai kitila kilmik a atn a rpma a kwap atuwen pa.

## **Pol lanaki Timoti pa la kil ikglen atn a rpma a kil alkil pa a wa a tu wrong kin a kipman a Maur Wailen**

*(Klapm 1-6)*

*Pol lanaki Timoti yek alkil pa la kil nikgwalpm  
arkentel rka pa*

<sup>1</sup> Kupm Pol, kupm melnum wokgen akwapel a Krais Sisas. Maur Wailen a pikekg awi mentepm ti aye kai eng alkilen pa, a wa Wailen Krais Sisas kil melnum a mentepm ukipma rpma nungkwan-gen la riwel pa, tuwekg pikekg takweiypm la kupm melnum wokgen akwapel a tuwekg.

<sup>2</sup> Kupm nira wrkapm kil eng kitn Timoti pake. Kupm pikekg angklinsein atom kitn ukipma atom kitn palng kol warim akupmen aklale. Kupm asen Yan Maur Wailen pa wa nampokgen Wailen Krais Sisas a mentepmen pa eng mpa tuwekg plan ipma wor ngklinsein, a ntokg ipma akitnen pa rki meen wor.

*Mentepm mpa ungkwan yangkipm wrongkwail  
a tu kaling plantepm kai manet pa*

<sup>3</sup> Kil kupm la lanikeitn or wrikel yangkipm a pikekg kupm lanakeitn ep ak wang a kupm la kaino anong kanokg Masetonia pa la, kitn rpmi anong Epesus pa, eng mpa kitn ri la tu melnum a kaling plan yangkipm ur manet a ake kai katila

yangkipm a Maur Wailen pa, pa kitn mpa la ok titnongket ngkengken eng ampake tu ik kolpa. Ti kupm la wa tilpeitn titnongket nti ur la kitn ik kolpa kai o!

<sup>4</sup> Wa kupm la wa tilpeitn or wrikel la kitn laniken eng mpa tu elngen a tu akwonalmacen akorla por kweikwei a kolpa a wa tu ak ker awiye nang a tu mamikg mamin mansan atuwen pa. Eng ntei, tu ik kolpa pa mpa wa ak antokg tu alntu pa wa alupm nikgwalpm watipmen nolangkil tita eng kweikwei a kolpa. Wa ake mpa wa ik ngklin tu melnum pa eng tu ikwonilmpen ya wor a Maur Wailen akwlenten la uwiyen eng alkilen. Melnum a uk ipma Krais pa kolti antiwe ore ya pa.

<sup>5</sup> Pake yiprokggen a kupm ti lanakeitn la kitn laniken titnongket a ngkengken kolpa pa itna kolkil: kupm wasrongen la tu mpa rkul nikgwalpm a plan ipma wor wasrongen tita iklale. Kol nol nikgwalpm atuwen pa mpa rki kukula wriwen wor kolti, wa kol ok wusok atuwen pa mpa iktitnongketelen la tu ake antokg paipm ur, wa kol tu mpa ukipma Sisas pa iklale, tu kutnun nikgwalpm kolpa pipa, pa ak angklin tu atom tu antiwe arkul nikgwalpm a plan ipma wor wasrongen tu melnum.

<sup>6</sup> Tu melnum tiur pa, tu am pikekg kai ar or ya manet atnuuring nikgwalpm wor kolpa yat ise, atom anel rka akor la yangkipm tiur a ake ak angklin melnum ur kolai pa, kalpis.

<sup>7</sup> Tu wasrongen la tu ti melnum a kaling plan yangkipm titnongket a Maur Wailen naki

tu wrong kin kipman, pake tu alntu ti ake wa ariwe yiprokgen a yangkipm a tu kaling planten a lanaken la pa yangkipm aklale pa.

**8** Pake mentepm ti pa, mentepm ariwe la kuina ur nira ela yangkipm titnongket pa wor a ak angklino. Kol melnum ur kil kiling plan yangkipm titnongket pa riworwor pa, yangkipm titnongket pa wor.

**9** Wā mentepm wa ariwe la, yangkipm titnongket pa ake itna eng la ik ngketen tu melnum a antokg kuina ur a wor pa, kalpis. Pa itna eng la ik ngketen tu melnum paipm kolkil:

- tu melnum a talpulng yangkipm,
- tu melnum a ake la orngwatneikgen melnum ur aki yangkipm titnongket ur,
- tu melnum a itna watin eng Maur Wailen,
- tu melnum a antokg paipmpaipm,
- tu melnum a ake katnun nikgwalpm ute wor a Maur Wailen,
- tu melnum a ake ngkark orngwatneikgen Maur Wailen ti,
- tu melnum a alm man alntu amo a tu melnum a alm yan alntu amo,
- tu melnum a alm melnum amo,

**10** wa tu kin a kipman a angkli arkul tita,

- wa tu kin a anti tu kin okg kinkipman, a tu kipman a anti tu kipman okg kinkipman,
- tu melnum a arkul ak ikgwampel melnum manet ur ai aye kai eng akawi marpm,
- tu melnum a kansil,

- tu melnum a naren Maur Wailen aki wrik om aki kweieur kolpa eng ak titnongketel yangkipm kansil atuwen pa,
- wa tu melnum a antokg kweikwei tiur manet kolpa a ak angketen yangkipm wor aklale a Maur Wailen a mentepm kaling plan pa.

Yangkipm titnongket pa am elng itna la ik lok tu melnum a antokg paipm kolpake.

**11** Kol mentepm uwi yangkipm titnongket pa ik titnongketel a ik lok tu melnum pa riworwor kolpa pa, yangkipm titnongket pa wor a ak angklins. Wa Yangkipm titnongket pa am kai irir yangkipm wor a la Krais a pikekg Maur Wailen elngkul kupm ti la kupm laron tike. Yangkipm wor pa lanako la Maur Wailen pa kil antiwe titnongket klalen wail mantan, atom mentepm mpa ngkit nang akilen pa iye kaino kwa.

*Maur Wailen pikekg plan ipma wor angklin Pol atom Pol uk wor kil*

**12** Kupm uk wor Krais Sisas Wailen almentepmen, melnum a alkopm alkopm titnongket pa eng kil pikekg ariwopm la kupm ti nungkulkg wor antiwe ikga ikwap wor, kolpa atom kil pikekg takweiyopm la kupm ikwap akilen pa.

**13** Aklale, pikekg ep pa kupm melnum pikekg itna kalnten awi wrongmanto lan tu a ukipma Sisas pa atom or ungkwan aknokgel tu pa, pati atnen a kupm ake pikekg ukipma kil pa a wa kupm ake pikekg ariwe kuina ur a kupm antokg pa, kalpis. Kolpa atom ari kil plan ipma arein alkil pa ak angklinsopm

**14** Wailen a mentepmen pa kil plan ipma wor areinsopm wail mantan paipm wrisen or kai ai. Pa ak angklinsopm, atom kupm ukipma kil a wa kupm plan ipma wor wasrongen tu wrongkwail. Am Krais Sisas pa kil alkomp nikgwalpm kolpake.

**15** Mentepm wrongkwail antokg paipmpaipm, pake kupm kil pa melnum paipm wrisen a pikekg antokg paipmpaipm angkomis or kai ai. Pake Krais Sisas kil pikekg nar kanokg ti eng ak awi mentepm melnum a antokg paipmpaipm. Kil yangkipm a mentepm atning atning a tu laron nako nako pa. Pa yangkipm wor aklale wrisen a kol a mentepm ukipma kutnun riworwor iye kimeket pa pati, kol a wor wrisen.

**16** Pikekg Sisas Krais kil arkul itna nungkwan-gen mentepm melnum a antokg paipm kolti. Kil la plan ipma wor alkil pa rein mentepm ti, kolpa atom ari kil plan ipma wor alkil pa arein kupm ti, kupm ti melnum paipm wrisen or kai ai. Kolpa atom kil elng kupm ti itna kol mrangkum ur a ikga tu melnum paipm kolai kolai ikga tu ri pa, tu riwe la, kil ikgam wa rkul ipma itni nungkwangen tu pa yat pake, la tu ukipma kil pa, tu ikga uwu yaprekg watin a rpma yongkyong.

**17** Kil pa Maur Wailen, ake Maur Wailen ur manet rpma, kalpis, kil alkil wris pa kolti. Kil melnum tukgunakg a rpma yongkyong, a kil ikgake imo, wa melnum ur ake ari kil pa, kalpis. Ti mpa mentepm ngkit nang a kil alkil wris ita pa iye kaino kwa ikngklei wang itni iye or pa kai pake! Aklale wrisen.

*Timoti mpa itni minsrang titnongket lok ngkli  
tulpulng nikgwalpm paipm*

**18** Timoti, kitn kol warim kipman alkupm a mentekg ukipma Krais, kupm alkeitn yangkipm a ela wrkapm kil la kitn ikwap kitila rpmi kai pa. Yangkipm kil kai katila yangkipm a pikekg Maur Wor a Maur Wailen ngkat okel tunteng melnum okwripm la kitn pa ep ak ai la ikga kitn ik pa. Ti kol a kitn lupmen yangkipm a pikekg tunteng aktitnongkeleitn pa rpmi kawor ipma akitnen. Pa kol wri wamung ur eng mpa kitn ik rapon riworwor, atom mpa kitn ik ngketen yangkipm manet a tu tiur kaling planten pa.

**19** Kitn ilmpwrong itni kolpa kai pa, kitn mpa rkul a kitn ukipma Sisas pa, a kitn kutnun ok wusok alkitn a alokeitn la kitn itn a rpmi wriwen wor pa. Kitn rkul kweikwei wekg pa iye itni titnongket ik rapon kolpa iye kai. Tu tiur a pikekg ukipma pa tu pikekg talpulng ok wusok alntu a aloken pa, atom tu angko kai antokg paipmpaipm. Atom a tu ukipma pa kolen wan unokgen a kai al atne wes atom tapor kai paipm pa.

**20** Imeneus a Aleksanter pa tuwekg melnum wekg ur a pikekg talpulng ok wusok a aloken pa atom a tuwekg ukipma pa kai paipm kolpa. Kolpa atom kupm elng tuwekg pa kai wam a Satan pa eng kil lken wleket, eng mpa tuwekg uwi riwe paipm a tuwekg antokg pa, eng ake mpa tuwekg la ik nokgel nang a Maur Wailen pa.

**2**

*Mentepm mpa oklala niki Maur Wailen eng ik ngklin tu wrongkwail*

<sup>1</sup> Ti kwei ur wail manten itna ep pa pati, kupm la tilpeitn la kitn laniki tu wrong kin a kipman a kipm ukipma Sisas pa eng kipm isen isen Maur Wailen pa, kipm oklala nikel, a kipm uwi ok a tu melnum wrongkwail pa ik isen eng ngklinsen, wa kipm wa ukwor a ngkit nang akilen pa. Kipm nti Maur Wailen pa oklala kolpa eng ik ngklin tu melnum wrongkwail.

<sup>2</sup> Tu melnum wrongkwail kol tu melnum tukgungnakg a tu mring man wailen wailen a nang arke pa, eng mpa tu ikglentepm riworwor eng kipm terng rki meen wor, eng mpa kipm itn a rppmi ntokg kuina ur kitila nikgwalpm a Maur Wailen kil wasrongan pa.

<sup>3</sup> Kipm oklala naki Maur Wailen kolpa pipa, Maur Wailen, Melnum a pikekg awiyo aye kai eng kil alkil pa, kil mpa itopen kirpo yangkipm ute wor eng oklala a kipm antiwel oklala pa.

<sup>4</sup> Kil wasrongan la uwi wrongkwail kin a kipman ti iye kul kai eng alkilen, wa kil wasrongan la tu uwi riwe yangkipm aklale akilen ti kutnun.

<sup>5</sup> Mentepm ariwe la Maur Wailen pa wris ata, wa melnum kuin a itna Maur Wailen a itna mentepm melnum ti pa, am Krais Sisas pake, kil pa melnum kol mentepm tike

<sup>6</sup> Pikekg Maur Wailen kil alm wang la kil ikga plan ngko wunong iklale la kil wasrongan la ikga ik uwi wrongkwail kin a kipman ti iye kai wor.

Kolpa atom Krais Sisas pikekg uk kil alkil pa amo akarmpen paipmpaipm a mentepm wrongkwail kin a kipman pa eng mpa mentepm wirng no itni kukula wor.

<sup>7</sup> Am yiprokgen kolpa atom ari Maur Wailen kil pikekg yapon kupm ti elngkitna kolen melnum a laron yangkipm wor kil, wa kolen melnum wokgen akwapel a Krais Sisas pa - kil kupm la aklale, ake kupm kansil pa. A wa kil yapontopm elngkitna kol melnum a kaling plan tu wrong kin kipman a ake a mentepm Suta pa, la kupm kiling planten yangkipm aklale pa eng tu ukipma.

<sup>8</sup> Kolpa ti kol kipm a ukipma Sisas pa kai tuk-wem rki wris kipor kilko ilein Maur Wailen rki yela tutu palpa pa, pa kupm wasrongan la kipm oklala niki Maur Wailen. Wa kupm wasrongan la kipm kipman pa la oklala niki Maur Wailen pa, kipm mpa ngkit wam alkipm pa iye kaino kwa oklala niki Maur Wailen pa, kipm ake mpa rkul ipma paipm a nikgwalpm watipmen atom oklala niki Maur Wailen pa, kipm mpa rpmi wriwen wor kolti.

*Atn a rpma wor a akwap wor pa kol lukglukg  
wor ur a kol a tu kin ik nukure tu alntu*

<sup>9</sup> Kupm wasrongan la tu kin pa mpa nowe apm wor wor ik aur num atuwen pa, pa am apake. Ake mpa tu nowe apm paipm eng mpa ik rkolng tu ikorla ringkowe a uk num paipm tu pa. A ake mpa tu nowe apm lukglukg wor wor a ari wor wrisen. Ake mpa tu klapm kampong noworel nukure numpwam alntu pa riworwor kai ngko

mis ik kweikwei kolen mikgni yawet rpmi wam, lil kroitnimpon, yipo tukgunakg pa, kolpa yaper.

**10** Kol tu la plan tu alntu ti la tu kin a ukipma katnun Maur Wailen pa, tu mpa ntokg kuina ur a wor kolti ik alkilel, pa kol lukglukg wor ur a tu ngkat ak nakure tu alntu pake.

**11** Tu kin pa mpa rku tu alntu ti kinar orngwatneikgen tu mla ur ai a kiling plan yangkipm a Maur Wailen pa tatar rpmi meen eng itning yangkipm pa.

**12** Kupm ake uk ya la mpa tu kin pa itni kiling plan tu wrong kin a kipman pa yangkipm a Maur Wailen pa, kalpis. Wa kupm ake wa uk ya la mpa tu wrekg itni wailen angen tu kipman pa, kalpis. Tu mpa tarng rpmi itning kolti.

**13** Eng ntei, pikekg Maur Wailen antokg Atam pa ep, plalng pa wa kil antokg Ip pa katnukg.

**14** Wa ake pikekg Satan pa ak palk ipaar kansil Atam pa, pa pikekg Ip pake. Atom Ip pa angko kai angketen yangkipm titnongket a Maur Wailen pake.

**15** Kin pa pikekg antokg paipm atom kil wa raku warim pa kil awi wleket. Atom tu kin pa wa raku warim pa tu wa awi wleket kolpa kul. Pake kol tu rku tu alntu orngwatneikgen atom ukipma Sisas pa, wa plan ipma wor wasrongan tu mla ur ai, a wa rpmi wriwen wor kolpa iye kai pa, Warim

Kipman pa mpa uwiyen eng alkilen.\*

### 3

*Mpa tu ngkit melnum kolai itni melnum tukgunakg ikglen tu wrong kin a kipman mapming a ukipma Sisas pa*

<sup>1</sup> Yangkipm a kupm la la kil pa akrale: kol nikgwalpm a melnum ur rka la kil a itni tukgunakg eng ikglen tu wrong kin kipman mapming a ukipma Krais Sisas pipa, kwap a kil wasrongen la uwi pa, pa mentepm kapornng yangkipm la pa kwap wor.

<sup>2</sup> Kolpa ti melnum a la itni melnum tukgunakg eng ikglen tu wrong kin kipman mapming a ukipma pa, kil mpa melnum kolkil:

- kil mpa melnum a ake wrongkwail elukgen ari la kil antokg paipm ur,
- kil mpa melnum a awi kin wris kolti,
- kil mpa melnum wontrakole,
- kil mpa melnum a arkul ipma alupm nikgwalpm wor,
- kil mpa melnum a mentepm alupmel worwor,
- kil mpa kipor ilei tu wokgmprak,

---

\* **2:15 2:15** Ok Krik a la mantolng kil pa ake la klalen, kolpa atom tu melnum ariwe tu la yiprokgen a mantolng kil pa la kweikwei watipmen. Melnum ariwe tiur pa la yiprokgen pa itna kolkil: Man ep Ip pa pikekg talpulng ok a Maur Wailen, atom kil wa raku warim pa kil awi wleket. Wa man katnukg Maria pa raku Warim Sisas pa, Warim pa ak awi tu mantin pa kai rpma wor. Kol tu ukipma, a plan ipma wor wasrongen tu mla ur ai, a wa tu rpmi wriwen wor a rpmi nimpokgen nikgwalpm wontrakole wor kolpa iye kai, pa Maur Wailen pa ikuwyen kai rpmi wor. **3:1 3:1** Kwap 20:28   **3:2 3:2** Tai 1:6-9

- kil mpa melnum wor a arowonel a kaling plan tu wrong kin a kipman nikgwalpm a Maur Wailen kil wasrongen pa.

<sup>3</sup> Kil ake mpa melnum a al u titno,

- kil mpa melnum a ake ipma wakget atom or aki ikle kamel pa,

- kil mpa melnum nikgwalpm wor kolti,

- kil ake mpa melnum a nikgwalpm arken la uwi marpm pa.

<sup>4</sup> A kil mpa melnum a ikgalen kin watnom a wan anong alkil pa ariworwor,

- kil mpa melnum a naki karkurng alupmen tu warim alkil pa ariworwor, eng mpa tu itning kutnun yangkipm akilen. Kil mpa ik won iro lok kil alkil ti, kil ake mpa ik ipma wakget ntokgten kai paipm pa.

<sup>5</sup> Kol melnum ake antiwe ikgalen alok kin a watnom alkil pa rka ariworwor pa, pa mpa wa kil ikglen tu wrong kin a kipman a Maur Wailen pa la kolai?

<sup>6</sup> Ake mpa kipm ngkit melnum a ukipma Sisas weten pa. Kol kipm ngkitel pa, kil mpa atop wam rka nol la kil ti melnum wor. Ti ikga wa Maur Wailen lkel wleket ikilmpe paipm a kil antokg pa, kolen pikekg kil uk wleket Maur Paipm Satan akalmpe paipm a pikekg kil antokg pa.

<sup>7</sup> Kil mpa tu melnum yimponen ai wa riwel kiporng yangkipm la kil pa melnum wor. Kolpa eng ake mpa tu iknokgel la paipmel kil pa atom kil ngkowe ran a Maur Paipm Satan ngkat pa.

*Mpa tu ngkit melnum kolai itni uwi kwap a ak angklin tu wrong kin a kipman mapming a kaingkai kapor kilko alein Maur Wailen*

**8** Am kolpake, kipm la ngkit tu melnum a akwap a ak angklin tu wrong kin a kipman mapming a kaingkai kapor kilko alein Maur Wailen pa, kipm mpa ngkit tu melnum kolkil:

- tu mpa melnum a kipm alupm worwor,
- tu mpa melnum a ake okmilip wekgenen,
- tu mpa melnum a ake al u titno atom titno pa,
- tu mpa melnum a ake aklampe marpm kweik-wei a tu tiur ai.

**9** Tu mpa melnum a atning katnun ok wusok alntu a naken pa atom tu ariwe la tu ake antokg paipm ur,

- a tu mpa rkul nikgwalpm ampen wrongkwail a Maur Wailen pa itni titnongket a pikekg kil laron nako atom mentepm ukipma pa, atom tu arkul katnun ari la pa aklale.

**10** Kipm ngkit tu melnum a kolpake, pake kipm lken kwap ur pa ep eng tu ik eng ik riwen la kol tu ikwap wor pipa, kipm ngkiten itni melnum akwapel a angklin tu wrong kin a kipman a ukipma Maur Wailen pa wom.

**11** Wa tu kin alntuwen pa, tu mpam wa kolpa yat pake.

- Tu mpa kin a kipm alupmen worwor,
- ake mpa tu la yangkipm elyirokgel melnum ur,
- tu mpa wontrakole, a tu mpa nungkulkg wor ikwap wrongkwail a tu alken pa iklale ute

riworwor.

- 12** Wa tu kipman kipm la ngkit pa,  
 - tu mpa melnum a aye kin wris ata,  
 - a tu mpa melnum a ikgalen tu warim a wan  
 anong alntu ti ariworwor.

**13** Ti kipm mpa ngkit tu melnum wor kolpake, eng  
 ntei, tu melnum a akwap ak angklin tu wrong  
 kin a kipman a Maur Wailen pa, kol tu ikwap  
 riworwor kolpa kai pa, tu pa mpa uwi nang wor  
 a tu ake mpa ngkirk, tu mpa itni titnongket laron  
 Krais Sisas a tu ukipma pa.

*Nikgwalm yiprokgen wrongkwail a Maur  
 Wailen a mentepm ukipma katnun pa kwei ur wail  
 manten*

**14** Kupm wasrongen la kupm a kai riweitn itatu  
 kai pake, kupm niranteitn wrkapm kil kaintein  
 tipen.

**15** Kol kweiur ik lokomp atom kupm mpenet  
 ingkul kil i pa, kitn ngkleikg wrkapm kil pipa,  
 mpa kitn uwi riwe kuina ur a kupm lanakeitn  
 pa, la kipm mpa itn a rpmi ikwap na na kolai  
 itni kawor yalming a Maur Wailen, kil alkil  
 yiprokgen a yaprekg watin a rpma yongkyong.  
 Wan yalming pa ak la kipm wrong kin a kipman  
 mapming akilen a ukipma kil pa. Wa kipm kol  
 ong a ak atne yangkipm aklale a Maur Wailen a  
 men laron laron pa atom itna ute aklale.

**16** Mentepm ariwe worwor kolpa la, “Nikgwalm yiprokgen ampen wrongkwail a Maur  
 Wailen a mentepm ukipma pa, pa wail manten  
 aklale”, pa mentepm wrongkwail ariwe atom

laron la am kolpa akrale pake. Nikgwalpm yiprokgen ampen a pikekg Maur Wailen planto pa pati kolkil:

- Kil pa pikekg palng melnum, man rakuwel, kil rpma kanokg ti kolpa kaingkai, kai kil amo kol mentepm tike.
- Wa kil wa melnum kol mentepm tike, nikgwalpm wrongkwail a kil alupm pa ute wor kol a Maur Wailen kil alkil pa.
- Kil pa plan kil alkil ti tu maur akwapel a Maur Wailen pa wa ariwel.
- Kil pa pikekg tu laron naki tu wrong kin a kipman a ake ukipma yela.
- Kil pa tu wrong kin a kipman yela kanokg ti ukipma katnun.
- Kil pa pikekg Maur Wailen awiyel aye kaino anong wor ai alkil nang wailen.

## 4

*Tu melnum tiur kaling plan yangkipm manet a ake kai or yangkipm a Maur Wailen pa*

<sup>1</sup> Mentepm wrong kin a kipman a Maur Wailen pa kol ong a ak atne yangkipm akrale akilen pa. Pake Maur Wor pikekg la klalen angko wunong la, ikga ik wang kutnukg pa tu melnum tiur a ukipma Maur Wailen pa tu ikga uk yirokg yangkipm akrale a Maur Wailen a mentepm ukipma pa, wa ngko yaper kai kutnun maur manet a ikga iyewen kai ar. A tu ikga itning kutnun yangkipm a tu mring, a mring maur a kweikwei kolpa, a tu melnum tiur ikga kiling plantepm pa.

**2** Tu melnum a ikga kiling plantepm yangkipm kansil pa, pa tu melnum a ak palk ipaarepm kolti. Satan pa anel kla ak amprin tu pa eng alkilen ise, atom ok wusok a tu melnum a kolpa am amo ise, atom tu ake antiwe ariwe la tu antokg paipm pa.

**3** Tu ikga kinsil kiling plantepm lala, ake mpa kin a kipman uwi tita iye, a wa la ake mpa il wlikgok aki okipma a angklonake pa. Okipma a wlikgok wrongkwail ti pa pikekg Maur Wailen kil antokg la pa woren plalngten. Kil la mentepm wrong kin a kipman a ukipma Sisas, a awi ariwe yangkipm aklale akilen pa, mpa mentepm uk wor kil pa plalng pipa, il. Pa Maur Wailen kil am awi wor kolpake.

**4** Eng ntei, kweikwei wrongkwail a Maur Wailen kil antokg ti pa, pa wor kimeket, ake ur paipm. Ti ake mpa mentepm ngklonike kweikwei ur, kalpis. Mentepm mpa ukwor Maur Wailen ti kolti atom mentepm il.

**5** Eng ntei, yangkipm a Maur Wailen pa la kweikwei wrongkwail pa wor kimeket, a wa mentepm ukwor kil pa atom kil ari kaporng yangkipm la pa wor.

*Melnum akwapel wor a itna ep ikgalen tu wrong kin kipman a Maur Wailen*

**6** Kitn kaling plan yangkipm kil tu melnum alkitn a kipm ukipma Krais Sisas pa, atom kitn pa melnum akwapel wor a Krais Sisas. Kitn awi yangkipm wor a mentepm ukipma pa wa nikgwalpm ariwe wor aklale a pikekg kaling planteitn atom kitn katnun pa, pa kol okipma a

kitn awi al eng wa ak titnongketel kitn alkintn pa yat.

**7** Kitn mpa uk yirokg itni watinet tukuleikgen yangkipm a tu kin nangkwor tiur a rka aut ok kalpmilel a elukgen Maur Wailen kolpa. Kitn mpa kiling kiling eng itn a rpmi ntokg kuina ur kitila nikgwalpm a Maur Wailen kil wasrongen pa.

**8** Eng ntei, mentepm ariwe la, mentepm kiling kiling ik titnongketel numpalk ti pa, pa mpa ik ngklin numpwam ti kolti. Pake mentepm kiling kiling ik titnongketel Maur Wor almentepm ti kutnun nikgwalpm a Maur Wailen pa, pa mpa ik ngklino kai kweikwei wrongkwail pa. Eng ntei, kil pikekg yapon yangkipm la ikga ik ngklin mentepm ti ik wang ti a mentepm rpma kanokg a ti, a wa ikga ik ngklin ik wang kutnukg a mentepm ntiwel rpmi kaino ai.

**9** Yangkipm kil pa yangkipm aklale wrisen, a kol a mentepm itning yangkipm kil ukipma kutnun yek kimeket pa kol a wor wrisen.\*

**10** Engntei, mentepm ukipma rpma nungkwan-gen ariwe Maur Wailen a rpma yongkyong, kil melnum a amo eng ak awi mentepm wrongkwail kin a kipman, wa kil melnum a ak awi mentepm melnum a ukipma pa. Kil pikekg yapon yangkipm la lko Maur Wor ik ngklino ik wang ti, wa ikga ik wang kutnukg kaino anong wor ai. Am yiprokgen kolpa atom ari mentepm aken kwap

---

**4:7 4:7** 1 Ti 1:4   \* **4:9 4:9** Mentepm ake ariwe la kil la yangkipm a i aklale wrisen pa, kil la yangkipm a ela mantolng wampwomis wampwompwraur ai aki yangkipm a ela mantolng wampwam ti.

**4:10 4:10** 1 Ti 2:3-4

tumplowisen nikgwalpm arkekgen kaling kaling nol nikgwalpm amentepm ti eng mpa mentepm itn a rpmi kutnun wasrongan a kil pa kolti.

**11** Kitn la kurkurng tu wrong kin kipman pa laniken a kiling planten yangkipm kweikwei kil eng tu kutnun.

**12** Kitn ti warimpen, pake ake mpa kitn elng melnum ur ri elukgen kitn ti la kitn warim ur kolti pa. Kitn mpa plan mrangkum wor kolkil tu melnum a ukipma Sisas pa eng mpa tu ri pa tu kutnun:

- kitn oklala, a wa ntokg kuinaur a wor kolti,
- kitn plan ipma wor wasrongan mlaur,
- kitn ukipma Sisas itni titnongket,
- a kitn wa itni wirng no kukula rukis wor itni wulmpa a Maur Wailen, eng mpa tu ri pa, tu kiling kiling kutnun.

**13** Kitn alkitn ti mpa ngkleikg yangkipm wrkapm a Maur Wailen pa niki kurkurng tu, a wa kiling planten tumplowis itni kolpa itni i i, kupm kaintein.

**14** Ampur kitn elngen kwap titnongket wor wor a pikekg Maur Wor a Maur Wailen alkeitn la kitn ik ik kwap alkilen pa, ik yikwon ningkrapm ilei rmpo kanokg pa. Kitn mpa wam nti tongtong kol kweiur wor a ak ak kwap pa.

Pa pikekg Maur Wor alkeitn ak wang a tu melnum wailen wailen a ikgalen mapming a tu wrong kin a kipman a Maur Wailen pa elng wam eleweitn oklala naki Maur Wailen. A wa Maur Wailen

pikekg angklo la wli ok a melnum okwripm ur laron kwap a titnongket a ariwe a Maur Wor alkeitn, la ik titnongketel kitn eng kwap a ikga kitn ik pa.

<sup>15</sup> Ti ikngklei wang pa kitn mpa uk kitn alkitn ti kimeket kiling kiling iken timplo kwap kweikwei wrongkwail a kupm la ti, eng mpa tu wrong kin a kipman ri atn a rpma a kwap a kitn ak pa palng wor kolpa iye kai iye kai.

<sup>16</sup> A kitn ukig lokipaar atn a rpma a kitn alkitn ti a wa yangkipm a kitn kaling plan tu wrong kin kipman pa, atom kitn ikwap pa kolpa iye kai o! Eng ntei, kol kitn ik kolpa pa, mpa ik ngklin kitn alkitn ti a wa tu mlaur a atning yangkipm a kitn kaling planten pa, ik iyewen iye kai wor.

## 5

*Timoti mpa ikglen tu warimpen, a tu kin nangkwor a mel nangkwor pa kolen la tu alntu walmpopm wris*

<sup>1</sup> Kupm la lanikeitn la, ake mpa kitn la kurkurng tu mel nangkwor pa minsrang. Kitn mpa laniken ik ipma meen wor kolti, kolen a kitn oklala anti yan alkitnen pa. Wa kitn la la kurkurng tu kipman warimpen pa, kitn mpa laniken ik ipma meen wor kolti, kolen a kitn anti wailen aki paipmen alkitn oklala pa.

<sup>2</sup> Wa tu kin nangkwor pa am wa kolpake, kitn mpa laniken la kurkurngken meen kolen a kitn anti man alkitn oklala pa. Wa tu kin warimpen pa am wa kolpake, kitn mpa laniken la kurkurngken

meen kolen la kitn oklala anti muikg mayen alkitn pa. Kitn ik nimpokgen nikgwalpm ute wriwen wor itni wulmpa a Maur Wailen.

*Timoti mpa ikglen tu kin karpikg a tu kipman karompen pa kolen la tu alntu walmpopm wris*

<sup>3</sup> Tu kin karpikg a warim kalpisen a ikgalenten pa, kitn mpa riwen wulmparpmewen riworwor eng laniki wrong kin kipman mapming a ukipma Sisas pa mpa orngwatneikgenten ngklinsen a ikglenten riworwor.

<sup>4</sup> Pake kol kin karpikg ur a warim aki walwalpopm alkil pa rpma pa, tu mpa ikglentel nimpokgen mla ur a antiwel rpma wan wris pa, tu mpa ikglentel ikilmpe wam a pikekg tu akten pa. Pa kwap itna ep a kol a tu ik am pake. Tu ik kolpa pa, mpa ik ntokg nikgwalpm a Maur Wailen pa itopen.

<sup>5</sup> Pake kin karpikg ur a kil rpma ak kil alkil ti kolti a ake wa melnum ur rpma eng mpa ikgalentel pa, kil ukipma rpma nungkwangen ariwe la Maur Wailen mpa ngklinsel pa, atom akangklei wang kil oklala naki Maur Wailen miningkranen eng kil ngklinsel.

<sup>6</sup> Pake kol kin karpikg ur kil antokg kuina ur katila nikgwalpm wasrongen a numpalk alkil ti pa, kil antokg Maur Wor alkil ti amo ise.

<sup>7</sup> Ti kitn uk yangkipm kil tu kin karpikg a wa tu warim walwalpopm atuwen pa, eng mpa tu itni rukis wriwen wor, atom ake antiwe mpa melnum ur ri lawen la tu antokg paipm ur pa, kalpis.

<sup>8</sup> Pake kol melnum ur kil ake ikgalen tu walmopm wris alkil pa ariworwor pa, pa kol kil ak

paipm wrisen. Wa kol ake kil ikgalen tu mamin wror mamikg mayen mansan a antiwel rpma wan wris alkil pa, pa kol kil ak paipm wrisen. Pa plan kolen la kil ake ukipma itna pa, kil am angko yaper kai paipm ise, a tu melnum a ake ukipma Sisas pa ake antokg paipm kol kil pa antokg pa.

**9** Kol kitn uwi nangkel tu kin karpikg pa, mpa kitn uwi nang a tu kin karpikg a kol kil:

- Uwi nangkel kin karpikg a angko wring kamel wraur a pa aye kaino, ake mpa kitn uwi nangkel tu kin karpikg a wring atuwen a kaino arken wring kamel wraur angko pa aye nar pa.
- Wa uwi nangkel kin karpikg a pikekg rpma eng kipman wris kolti.\*

**10** A kitn mpa uwi nangkel kin karpikg a tu wrongkwail kapornng yangkimp la kil kin a akwap wor:

tu ariwe la kil pikekg ikgalen tu warim alkil pa ariworwor, a kil kapor alei yiprokg watinet, a kil klak nepm a tu melnum tiur alntu a ukipma Sisas a ya ur wli pa, wa angklin mlaur a arki kalkuten, a wa uk kil alkil ti kai akwap wrongkwail a wor. Pa mpam kitn uwi nangkel tu kin karpikg

---

\* **5:9 5:9** Mentepm ake ariwe la yiprokgen kolai atom tu awi nang a tu kin karpikg tiur kolpa kolti. Tu melnum ariwe tiur pa tu akwonalmacen la tu kin karpikg tiur a tu kipman amo atnurngken pa, tu pikekg yapon yangkimp la tu ikga rpmi ikwap a Maur Wailen kolti, ikgake wa uwi kipman ur pa. Atom tu melnum a ukipma Maur Wailen pa awi nang a tu kin karpikg a kolpa pa eng mpa tu ik ngklinsen eng okipma kweikwei.

a akwap kolpa ikalkilel pake.<sup>†</sup>

**11** Pake kitn ake mpa nira nang a tu kin karpikg warimpen pa, eng ntei, kol tu yipon yangkipm la rpmi kolti ikwap a Krais pa, ari nikgwalpm was-rongen atuwen pa wa wrekg la nti kipman okg kin kipman. Kolpa kaingkai wail titnongket pa, pa mpa wa ntiwe ik rkolngken iye kai utnuurng Krais pa, atom tu wa la uwi kipman pa.

**12** Tu ik kolpa pa, pa mpa ik ngketen yangkipm a pikekg tu wangkir a yapo nampokgen Krais pa. Pa tu wrong kin a kipman mpa ri la pa tu antokg paipm.

**13** Kol ikga tu itn wan ur wan ur ikwap ik ngklin tu melnum tiur pa, nikgwalpm a tu pa ikga rki manet, atom tu ikga ikwap ik lpmaakel. Ikgake tu ikwap ik lpmaakel pa wris pa, tu ikga wa nepm itni kwa op lawokg wan ur wan ur elng nungkulkg rmp iitning oklala na ur a tu tiur ai akor la wai, a wa la elyirokgel tu mla ur ai, a wa tu ikga oklala kweikwei tiur a ake wor kol mpa tu la pa.

**14** Kolpa atom kupm mpa ngketen la, ake mpa kipm nira nang a tu kin karpikg warimpen pa nimpokgen tu kin karpikg a kin nangkwor pa. Kupm akwonalmepn ari tu kin karpikg warimpen pa wor kol a tu kai uwi kipman pawo, eng ikga tu iye warim, a ikglen tu nan watnom alntu pa rpmi wan anong alntu pa. Kol tu

<sup>†</sup> **5:10 5:10** A melnum ur a ya pa wli kul kawor wan wunen pa, pa kwap a melnum a akwap kalpmlel orngwatneikgen mring alkil pa, mpa klak nepm mang a melnum pa. (Mat 20:25-28)      **5:13**

**5:13** 2 Te 3:11    **5:14 5:14** 1 Kor 7:9

ikwap wor kolpa pa, pa ake mpa tu wrong manto amentepm pa tu ri paipm ur atom la paipmelo pa.

**15** Ti kitn ari pa, tu kin karpikg warimpen tiur am angko yaper kai atnuurng ya wor pa kai ar katnun Satan ise.

**16** Kol kin mlaur a ukipma Krais pa, kol kin karpikg walmpopm wris ur alkil pa rpmi pa, mpam kil alkil pa ikglen kin karpikg pake. Eng ake mpa wa ikuke tu wrong kin kipman mapming a ukipma Krais pa wa ikglentel pa. Kolpa eng mpa tu wa ntiwe ikglen tu kin karpikg a ake melnum ur rpma eng ikgalenten pa.

*Mentepm mpa ikglen tu melnum wailen wailen akwapel a Maur Wailen pa riworwor*

**17** Tu melnum wailen wailen a akwap wor tumplowis ikgalen tu wrong kin kipman mapming a ukipma Krais pa, tu wrong kin a kipman pa mpa uk wor wail: tu mpa ngkit nang atuwen, a wa lken marpm a kweikwei ikilmpe kwap wor a tu ak pa. Tu melnum a kol a kipm uk marpm kweikwei a uk wor wail ep pa am tu melnum a akwap a angkli yangkipm, a tu melnum a kaling plan kipm yangkipm a Maur Wailen pake.

**18** Ti wrkapm a Maur Wailen pa la kolkil la, "Kitn ampur yapo ok a manto nepm watin a angkom ele apur wit ok pa." Wa Sisas pikekg la kolkil la, "Melnum akwapel pa, kil mpam uwi marpm eng ikilmpe kwap a kil ak pake."

**19** Kol melnum wris ur lala rki melnum wailen akwapel ur a Maur Wailen pa la kil antokg paipm pa, ake mpa kitn itning la pa aklale pa. Kitn mpa

itning melnum wekg aki wraur pa la oklala pa irir kolen tita pipa, kitn itning o!

**20** Melnum a kil ntokg paipm kolpa itni pa, mpa kitn la lok paipm a kil antokg pa itni wulmpa a tu wrongkwail ai, eng mpa tu ri pa, tu mpa ngkirk.

### *Pol uk yangkipm Timoti*

**21** Kil kupm naren Maur Wailen a Krais Sisas a tu maur akwapel klalen pa, la kitn mpa kutnun yangkipm a wet kupm la karkurngkeitn pa, atom kitn ake mpa ngkit rku tu melnum wailen wailen a nang arke aki yiprokgen ur alkitnen pa. Kitn ri la ikten kolai pa, kitn mpa ikten irir kimeket kolti.

**22** Ake mpa kitn elng wam pa ele melnum ur pa itatu ik mprinsel eng la kil palng melnum akwapel a Maur Wailen pa, pa yaper. Melnum pa ngko kai paipm pa, pa kipmekg yatenen am angko kai paipm ise, atnen a kitn pikekg elng wam ele melnum pa atatu. Ti kitn mpa ikglen kitn alkitn ti itni rukis wor kolti.

**23** Timoti, kitn ti numpet perper itna kolti, ti ampur kitn al u kolti pa. Kitn wa il u wain waiketnketcn ur pa nti wris wris numpokgen, eng mpa wa ik ngklin ipmanikg akitnen pa.

**24** Kol a wet kupm la pa la, ake mpa kitn elng wam ele melnum ur itatu ik mprinsel eng la kil ikwap a Maur Wailen pa eng ntei. Paipmpaipm a tu melnum tiur pa palng angko wunong mentepm atning ari ise, atom mentepm la mpa ngkit melnum kolai kolai. Pake paipmpaipm a melnum tiur pa itna am itna pa, ikga wa palng ngko wunong kutnukg.

<sup>25</sup> Am wa kolpa yat pake, nikgwalpm wor a antokg kuina ur a wor pa am palng angko wunong tu ari pake. Wa nikgwalpm wor a antokg kuina ur a wor a itna am pa, ikgake wa itni am pa, ikga wa palng ngko wunong pa.

## 6

*Tu melnum a aken kwap kalpmlel orngwatneikgen mring ur ai pa, tu mpa ikwap riworwor*

<sup>1</sup> Tu melnum a ukipma Krais a pikekg tu mring ipmawekg armpeten eng aken kwap kalpmlel orngwatneikgen tu pa, tu mpa lupm nikgwalpm a orngwatneikgenten a arku tu alntu a ngkat nang a tu mring alntu pa. Mpa tu ik kolpa eng ake mpa tu mring alntu pa la paipmel nang a Maur Wailen a yangkipm wor a mentepm kaling plan pa.

<sup>2</sup> Melnum a aken kwap kalpmlel orngwatneikgen mring alkil pa, kol mring alkil pa kil melnum a ukipma Krais pa, ake mpa wa melnum akwapel alkil pa lala, “Palpa mentekg almentekg a ukipma Krais pa, ti mpa kupm ikwap paipmel.” Kolpa kalpis, kil mpa ikwonilmpen lala, mring a kil aken kwap angklinsel pa kil melnum alkil a tuwekg ukipma Krais, a kil melnum a tuwekg plan ipma wor wasrongen tita, ti kil kol a itopen ikwap riworwor.

*Marpm ti akwap wor a marpm ti akwap paipm*

Kitn mpa laron yangkipm kil kiling plan ik titnongketel tu wrong kin kipman eng mpa tu kutnun.

<sup>3</sup> Kol melnum ur kil kiling plan yangkipm

manet a ake kai irir katila yangkipm ute wor akrale a Wailen amentepmen Sisas Krais pa wa nikgwalpm wor a katnun nikgwalpm a Maur Wailen a mentepm kaling plan pa.

**4** Kolpa pipa mentepm ariwe la, melnum pa kil wam rka nol kalpmilel kolti, pa kil ake ariwe nikgwalpm wor ur kalpis. Kil arpmen nikgwalpm raimpe paipm alkil pa rpma wail, la nti tu ik yangkipm rapon a nolangkil tu pa. Atom pa ak antokg tu melnum tiur wrekg ipma paipm aringkowe kweikwei a melnum manet, tu akle tita, tu aknokgel tita, a tu arki tita kalpmilel kalpmlel.

**5** Melnum pa kil ak kolpa pa wa ak antokg tu melnum tiur alilakel tita akangklei wang. Tu melnum pa pikekg wampelngen yangkipm akrale a Maur Wailen, a nikgwalpm a tu pa kai paipm raimpe ise. A wa tu akwonalmpen la ya a katnun Maur Wailen a akwap akilen pa ya a awi marpm kweikwei eng rpma antiwe am pake.

**6** Ei, pa akrale: kol mentepm itopen kweikwei wrongkwail a mentepm antiwe rpma ti ise, la pa am apake, pati pa ya a ukipma katnun Maur Wailen pa am ya a awi kweikwei wor wor wailet a Maur Wor a Maur Wailen pake.

**7** Pikekg man rakuwo pa ake pikekg mentepm aye kweiur nakurnum wli kanokg ti pa, kalpis. Wa ikga mentepm wa imo utnurng kanokg ti pa, ikgake wa mentepm iye kweiur nukurnum kai pa, kalpis.

**8** Kolpa ti, kol mentepm antiwe okipma apmnung pa, mpa mentepm itopen pa la pa am apake.

**9** Pake mlaur kil wasrongen la rpmi ntiwe kweikwei wailet angen a kil antiwe pa, pa nikgwalpm kolpa pa mpa ik lokel kai ngkowe lem a Satan ale pa. Nikgwalpm a kil pa wrekg wasrongen paipm la ntokg kweikwei a kol a tu melnum titnowen ntokg pa a kweikwei a uk wleket kil alkil ti. Nikgwalpm wasrongen a wrekg titnongket kolpa mpa ik rkolngkel iye kai ngkliwel elng kinar lkim watin atom kil ikga kai paipm.

**10** Ipma wrekg wasrongen paipm la uwi marpm pa am yiprokgen a ak arkolng kamel aye kai antokg paipmpaipm wrongkwail pake. Tu tiur pikekg wasrongen paipm la uwi marpm, atom tu kai ar uk yirokg Maur Wailen, atom tu uk wleket wailet tu alntu kolen ikyom a ikningkil a arkewen pa.

*Timoti mpa pirng nti tu ik kiporen tita titnongket kai ngko wrlik a kai elngen pa*

**11** Tu a nikgwalpm wrekg wasrongen paipm la uwi marpm a kweikwei wailet pa kolpake, kitn ti pa, kitn melnum a Maur Wailen. Ti kitn mpa uk yirokg ngkom nlokgen nikgwalpm wrongkwail a kolpa. Kitn mpa nikgwalpm rkekgen eng kutnun nikgwalpm kolkil: rpmi ute wor kolti, ntokg kuina ur kolen a Maur Wailen kil wasrongen pa, a ukipma Sisas itni titnongket, a plan ipma wor wasrongen mlaur, a rkul ipma itni titnongket rki kalkuten wrongkwail, a plan ipma meen wor eng wrongkwail.

**12** Kitn mpa ukipma Krais pa riworwor kolpa iye kai, pa kol kitn anti tu ak kiporen tita pirng tit-nongket. A kitn mpa rkul Maur Wor pa tongtong kolpa kaingkai, kai palng anong wor a ikga kitn rpmi yongkyong pa, pa kol kitn pirng ak kipor tu pa kai ngko wrlik alkil a mentepm pirng kai elngen pa, atom kitn uwi kweir wor. Krais pa pikekg akweweitn la kitn kul ukipma eng mpa uwi yaprekg watin a rpma yongkyong. Atom kitn pikekg itna wulmpa a tu wrongkwail pa kitn laron kitn alkitn ti la, “Kupm ukipma Krais”, atom tu wrongkwail pikekg atning ari pa.

**13** Kupm naren Maur Wailen, kil melnum a uk yaprekg kweikwei wrongkwail ti eng palng malepmen pa, a kupm naren Krais Sisas, kil melnum a pikekg antokg yangkipm itna Pontius Pailat pa kil laron kil alkil ti ak titnongketel yangkipm aklale a kil alkil ak laron kil alkil ti, ti kupm naren Maur Wailen a Krais Sisas pa la la kurkurng kitn Timoti ti la kolkil la,

**14** kitn mpa rkul yangkipm pa ikglen riworwor eng mpa itni ute, ake mpa kai am aki kai ar pa eng ake mpa mla ur laweitn la kitn ikgalen paipmel pa. Kitn ikglen riworwor kolpa kai ngko wang a Wailen amentepmen Sisas Krais kil yaper nar ai.

**15** Maur Wailen kil ikga la, atom Krais kil ikga nar palng ngko wunong ik wang alkil a pikekg Maur Wailen kil alm ai. Maur Wailen kil melnum mrer wail wor atom mentepm kapor kilko aleinsel a mentepm atopentel. Kil wris ata

kil wail manten itna ep antiwe titnongket ikgalen kweikwei wrongkwail, kil melnum tukgunakg itna ep ikgalen tu melnum tukgunakg wrongkwail, a wa kil Wailen itna ep ikgalen tu melnum wailen wailen wrongkwail.

<sup>16</sup> Kil alkil wris pa ake antiwe amo. Wa kil pa melnum klalen wakget paipm ai a kil itna klalen, akentiwe melnum ur kai wreren kil pa, wa melnum ur ake pikekg ari kil pa, wa melnum ur ake wa antiwe ariwel ak wulmpa pa, kalpis. Ti ikngklei wang pa mentepm mpa ngkit nang akilen iye kaino kwa itni yongkyong titnongket iye or ai kai! Aklale wrisen.

*Tu melnum a antiwe kweikwei wailet pa tu mpa ik ngklin tu tiur ai*

<sup>17</sup> Wa tu melnum a antiwe kweikwei wailet itna kanokg ti pa, kitn mpa la kurkurngken la, ake mpa tu wam rka nol ngkit nang pa eng kweikwei wailet a tu antiwe pa. Wa ake mpa tu nikgwalpm rken ukipma la kweikwei alntuwen pa ikga ik ngklinsen kolpa iye kai pa, pa kalpis, kweikwei pa ikga kai paipm plalng. Tu mpa ukipma Maur Wailen wris ita kolti, kil melnum a alko kweikwei wor wor wrongkwail a mentepm ak arpme rpma kanokg ti eng la ik ntokg mentepm itopen.

<sup>18</sup> Wa kitn mpa wa la kurkurngken eng mpa tu ik nikgwalpm a wor wor kolti. Tu ake mpa langkinen kweikwei atuwen ti pa, tu mpa itopen eng mpreing kweikwei wailet atuwen ti eng ik ngklin tu mlaur a rpma tukwok ai, pa tu ikga ntiwe nikgwalpm wor wor kolpa.

**19** Kol tu mitaket a ik ngklin tu ur kolpa pa, pa kol tu takwem kweikwei wailet wor wor elng itna, eng ikga tu won ngklin ik wang kutnukg ai. Pa kol tu alm tipmakg wor pa eng la ikga tu kaino rppmi wor yongkyong uwi kweikwei wor wor pa.

*Timoti, kitn ikwap ukkg ikglen kitn alkitn*

**20** O Timoti, kitn mpa iken yipmingki ikglen kwap a yangkipm wor a pikekg Maur Wailen alkeitn pa riworwor. A kitn mpa uk yirokg oklala tiur a yiprokgeng kalpisen a Maur Wailen ake atopen, a yangkipm tiur a ake wor a tu ak alilakel tita yangkipm aklale a Maur Wailen pa. Pa tu melnum a lala tu ti awi ariwe wor wor yangkipm aklale pa, pake pa tu kai ar kaling plan yangkipm kansil la pa yangkipm aklale a Maur Wailen pa. Ti kitn mpa itni watin tukuleikgen tu pa.

**21** Tu melnum tiur am pikekg la tu alntu ti la, tu ariwe worwor yangkipm a Maur Wailen kolpake, atom tu atnurng Krais a pikekg tu ukipma pa, atom tu kai ar.

Yangkipm akupmen am kai itna kolpake.

Kupm oklala naki Maur Wailen eng mpa kil plan ipma wor alkil ngklinsepm iye kolpa kai.

**Kla Weten A Maur Wailen Lam  
The New Testament in the main dialect of the Urim  
language of Papua New Guinea  
Nupela Testamen long tokples Urim long Niugini**

copyright © 2024 SIL Papua New Guinea

Language: Urim

Dialect: main

Contributor: Wycliffe Finland and Finnish Evangelical Lutheran Mission

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-12

---

PDF generated using Haiola and XeLaTeX on 12 Sep 2025 from source files dated 12 Sep 2025

2e27dc3a-67e0-5642-ba90-804f3df7d2c5